

Pri. 21. Num. 3

16.

1733, 1. 11

DE
PACTO FIDVIAE
EXERCITATIO II.

QVAM
PRAESIDE

D. FRANCISCO CAROLO CONRADI
IN ACADEMIA IVLIA PROF. PVBL. IVR.
ORDIN.

IN IVLEO MAIORI

A. D. AVGVSTI MDCCXXXIII.
AD DISPV TANDVM PVBLICE PROPONET

FRIDERICVS BENEDICTVS KVBEL
HALBERSTADIENSIS.

HELMSTADII,
TYPIS PAVLI DIETERICI SCHNORRII
ACAD. TYPOGR.



THEATRUM
EXERCITATIONUM

THEATRUM EXERCITATIONUM


EXERCITATIONUM

EXERCITATIONUM

EXERCITATIONUM

EXERCITATIONUM

EXERCITATIONUM



CONSPECTVS
EXERCITATIONIS II.
DE PACTO FIDVCIAE
IN QVA ACTIO ET IUDICIVM FIDVCIAE
EXPLICANTVR ET VESTIGIA EIVS IN
PANDECTIS ET CODICE RELIQUA
ILLVSTRANTVR.

*D*istincte Formulae pacti & iudicij Fiduciae, §. I.

*P*acti Fiduciae propria verba, §. II.

*A*rbitrii Fiduciae propria formula, §. III.

*F*iduciae iudicium bonae fidei & famosum, §. IV.

*A*CTIO FIDVCIAE ex Lege XII. Tabularum deduci-
tur, §. V. quomodo ea potuerit ex pacto esse? & que
eius Formula? §. VI.

*A*ctionis huius natura. Erat alia directa, alia utilis,
§. VII.

*A*ctio Fiduciae directa ad quid data? §. VIII.

*D*ubia contra omnis culpe & periculi prestationem ob-
iecta, §. IX. Quae diluuntur, §. X.

*E*tiam damnum culpa lata aut levi datum non ultro re-
stituens possessor fiduciarius, infamia notatus, §. XI.

*A*ctio Fiduciae dabatur etiam heredibus & adversus he-
redes, §. XII. cessabat, pignore iuste vendito, §. XIII.
nec Fiduciae iudicio tenebatur, qui liberum hominem
noxae deditum manumiserat, §. XIV.

*T*ransitio ad disquisitionem, quo tempore & auctore subla-
tum sit pactum Fiduciae? §. XV.

Ne-

Necessitas pignoris fiduciarii minor post Actionem Hypothecariam introductam, §. XVI.

*Fiducia non abrogata Lege CONSTANTINI M. §. XVII.
sed simul cum solenni mancipatione, a IVSTINIANO
sublata, in usu esse desit, §. XVIII.*

*Vestigia Fiduciae in PANDECTIS, in L. 5. §. 2. com-
modat. §. XIX. in L. 9. §. 2. & L. 35. §. 1. de pignor.
act. §. XX. in L. II. de pignor. & hypoth. §. XXI.*

*Questio tractatur de servitutibus urbanorum preditorum,
utrum oppignerari, aut hypothecae dari nequeant, &
ob quam causam? & CVIACII, DVAREN, ME-
RILLII diversae sententiae recensentur, §. XXI. DVA-
RENI sententia pluribus argumentis a GALVA-
NO firmata & ab obiectionibus vindicata, §. XXIII.*

*Vestigium Fiduciae & emblema TRIBONIANI in L. 16.
§. ult. D. de pign. & hypoth. negatur, §. XXIV.*

*Vestigia Fiduciae in L. 23. §. 1. D. eod. tit. §. XXV. in
L. 12. pr. D. de distract. pignor. §. XXVI. in L. 9.
D. de supell. leg. §. XXVII. in L. 45. D. de Reg. Iur.
§. XXVIII.*

*Fiduciae vestigia quedam in CODICE IVSTIN. in L. 9.
de pigner. act. L. 2. si vendit. pign. agat. §. XXIX.*

Fiduciae mentio in Legibus Langobardorum, §. XXX.

*Nomen Fiduciae pignus nudum apud Langobardos &
Francos notavit, §. XXXI. Conventiones, Fiduciae
Romanorum similes, ab illa non repetendae, §. XXXII.*





DE
PACTO FIDUCIAE
EXERCITATIO II.

§. I.

IAm vero sanctitatem pacti Fiduciae porro spectabimus in solenni eius formula, quam in Exercitatione priore a) inter emancipationis ritus talem retulimus, qualis a CAR. SIGONIO b) aliisque referri solet. Nunc tamen accuratius constituemus propria & solennia Fiduciae contrahendae verba, luculentissimo CICERONIS indicio, c) quod, uti IAC. RAEVARDVS d) bene animadvertisit, discernere iubet

*Distinctæ
Formulae
pacti &
iudicij
Fiduciae.*

a) §. V.

b) *De Iudiciis Lib. I. cap. 5. & n.*

c) *De Officiis Lib. III. c. 17. Nam quanti verba illa: VTI NE*

*PROPTER TE FIDEMVE TVAM CAPTVS FRAVDA-
TVSVE SIEM! quam illa aurea: VT INTER BONOS
BENE AGIER OPORTET, ET SINE FRAVDATIONE!*

Manifeste CICERO has verborum solennes conceptiones distinguit: priorem vero esse formulam conventionis, nemo dubitat: posteriorem esse iudicii formulam, probabitur ad §. III.

d) *De Auctorit. Prudent. cap. 5.*

2 DE PACTO FIDUCIAE

bet ipsam pacti formulam ab altera formula, in quam iudicium sive potius arbitrium Fiduciae dabatur.

§. II.

Pacti Fiduciae propria verba. In concipiendo igitur Fiduciae pacto solennia verba erant hæc : VTI NE PROPTER TE, FIDEM VE
TVAM CAPTVS FRAVDATVS VE SIEM. *Quanti* verba illa ! inquit CICERO. Breviter huius formulæ potestarem expressit laudatus modo RAEVAR DVS : Ea postulatum esse, ut interposita servaretur fides remanicipationis, ne dolus, qui in hoc iudicium venit, ipso iure vindictetur. Sed portissima verborum vis ad fidem singularē & exuberantem, a mancipatore in amico rem fiduciariam accipientem, spectat. Hæc enim est fides illa, qua vitam contineri CICERO alibi dixit, a) intelligens istas vitæ necessitates, quæ fiduciariæ mancipatiōnis usum fuerunt, præferim in depositi & pignoris contractibus. Hæc est bona fides, quæ, secundum illud TRYPHONINI, b) exigit, ut commissam rem recipiat is, qui dedit. Nec sine causa in Fiduciae pacto Romani hæc duo coniungi voluerant : CAPTVS FRAVDATVS VE SIEM: quæ verba alias quoque iunguntur, velut in Actionis de peculio formula : ET SI QVID DOLO MALO DOMINI CAPTVS FRAVDATVS QE ACTOR EST. c) Verbum enim, capi, proprie ad negotii vere gesti mendacem diffinulationem & cavillationem, fraudari vero ad damnum, quod inficiatione rei sub Fiducia mancipata insertur, pertinet. Fraudis enim conditio ea est, opinor, si quis alienum rapiat, aut alii debitum denegeret, uti TERTVLLIANVS ait, d) & secundum illud

PRV-

a) Pro Q. Roscio Comædo, c. 6.

b) L. 31. §. 1. D. depositi.

c) L. 36. §. 1. D. de pecul. L. 1. §. 42. D. depof.

d) De Idolatria, c. 1.

EXERCITATIO II.

3

PRUDENTII, *Fidei fraus est inficiatrix.* a) Hinc
TVLLIVS *fraudatorum atque inficiatorum impudenciam* coniungit, b) idemque in istis negotiis fidem
sanctiorem & exuberantem desiderantibus *fraudationis* verbo semper utitur: c) & sic Iurisconsulti veteres
pariter in tutela, societate, deposito circumventionem
factam *fraudis* appellatione designant: d) quoniam
in his præterim regnat bona fides, *contraria fraudi & dolo.* e) Itaque integra mancipationis fiduciarum
formula talis fuisse videtur: EGO HANC REM ME-
AM TIBI MANCVPO, VT EAM MIHI REMAN-
CVPES, VTI NE PROPTER TE FIDEMVE TV-
AM CAPTVS FRAVDATVS VE SIEM.

§. III.

In illa vero Formula, qua iudicium sive arbitrium *Arbitrii*
Fiduciæ dabat Prætor, solennia conceptaque verba *Fiduciæ*
erant: VT INTER BONOS BENE AGIER OPOR-^{propria}
TET ET SINE FRAVDATIONE: f) quæ, tanquam formula,
aurea, prædicat, ac Fiduciæ iudicio illa diserte adscri-
bit CICERO, pluribus locis. g) Atque hæc ipsa ver-
ba

A 2

ba

- a) *Psychomach.* v. 632.
- b) In *oratione pro Flacco* c. 20.
- c) *Pro Cætin.* c. 3. *Pro Q. Rosc.* c. 6.
- d) *L.* 32. *D.* deposit. *L.* 60. §. ult. *D.* mandati. *L.* 3. §. ult. *D.* pro
socio. *L.* 2. *D.* de suspect. tutor.
- e) *PAVLVS* in *L.* 3. §. ult. *D.* pro socio.
- f) Hæc verba fuisse propria ac peculiaria arbitrii Fiduciæ, no-
tavit etiam *B. BRISSONIVS*, *de Formulis Lib.* V. p. 352.
edit. nov.
- g) *Topicorum* c. 17. *In omnibus igitur iis IUDICIIS*, inquit,
in quibus EX FIDE BONA est additum - ubi vero etiam:
VT INTER BONOS BENE AGI OPORTET. Et *Epistolar.*
ad famil. *Lib.* VII. *epist.* 12. ubi in C. Trebatum Testam
locatur, quod in Epicuri castra transiisset: *Vbi porro illa*
erit formula Fiduciæ; VT INTER BONOS BENE AGIER
OPOR-

4 DE PACTO FIDUCIAE

ba ex formula pacti Fiducia petita sunt, pariterque dolum malum abesse, & si reus per Fiducia rationem actorem fraudasse proberet, fidem fractam vindicare iubent. Evidem, qui *sunt boni*, & quid sit bene agier, magna *questio* dicitur apud *TVLLIVM*: a) novimus tamen elegantem & vitæ civili recte convenientem boni viri definitionem ab eodem propositam: *virum bonum esse*, qui *prosit*, *quibus possit*, *noceat nemini*, nisi *lacestitus iniuria*: b) *quiique ita se gerit*, *ita vivit*, ut eius probetur *fides*, *integritas*, *equalitas*, *liberalitas*. c) Et quamvis, *virum bonum aliquem esse*, innumerabilibus officiis & laudibus contineatur, in hoc tamen Fiducia iudicio boni viri nomen requirit præfertim fidem, etiam cum clam & impune posset, fallere nesciam, hominemque, ut in vetus proverbio est, *dignum*, *quicunq[ue] in tenebris mices*. Nec enim vulgarem fidem in alterius persona sperat & sequitur, qui dominium rei suæ in alterum transferre non dubitat sub pacto de ea

OPORET. Item de *Officiis Lib. III. c. 15.* Reliquorum autem iudiciorum hac verba maxime excellunt: *in arbitrio Rei Vxoriz: MELIVS AEQVIVS: in Fiducia: VT INTER BONOS BENE AGIER.*

a) *De Offic. Lib. III. cap. 17.*

b) *Eodem libro c. 19.*

c) *In Latio, c. 5. HORATIVS Epist. I. 16. v. 40. s.*

VIR BONVS est quis?

Qui consulta Patrum, qui leges iuraque servat:

Quo multe magnaque secantur Iudice cause,

Quo Responsore, & quo causa teste tenentur.

Et sic in iure nostro Boni Viri nomine quilibet iustus, & quis,

innocens, & prudens consideratusque paterfamilias intelligitur,

ut plurimis exemplis ostendit BRISSONIVS de Verb.

Signif. v. Bonus. Add. CVIACIVS ad Africatum Tractatu

VI. ab init. Tales vero quia iudicis præfiebantur, & Iudi-

cem viri boni & innocentis officio fungi oportet, ut VLPIA-

NVS ait in L. 4. §. 1. D. Fam. cricisc. hinc est, quod iudices tan-

EXERCITATIO II.

5

ea recipienda, & quomodo PVFENDORFIUS a) Fiducia rationem secundum Ius Gentium explicat, cum alias, in quem dominium rei alicuius translatum fuit, de ea pro lubitu disponere, adeoque eandem sibi in perpetuum retinere, vel in quemcunque transferre queat, adiecto istoc pacto tantam de eius pudore ac fide fiduciam concipiimus, fore, ut idem dominio suo non aliter, atque conventum fuit, utatur, eoque lubenter iterum cedere nobis velit. Propter hanc fidem in altero positam spectatamque merito summum nefas Romanis habebatur, alterum caput fraudatumve esse, cumque se putaret invenisse fidum rei lux custodem, eum incidisse in perfidum prædonem, hominem nequam & improbum furem, qui neget rem fidei suæ commissam, inficietur legem restituendi, contendat se perpetuo ac irrevocabili dominii iure ab altero mancipatam sibi rem tenere. Quapropter in Fiducia iudicio reus, ut inter bonos bene agier oportet & sine fraudatione, remancipare rem sibi sub Fiducia lege mancipatam iubebatur.

§. IV.

Erat hinc Fiducia iudicium bonæ fidei & famo-
sum. Ita enim Q. SCAEVOLA Pont. Max. fidei bo-
ne nomen exigitur manare latissime, idque versari
in tutelis, societatibus, FIDUCIIS, mandatis, rebus
emptis, venditis, conductis, locatis: quibus vita socie-
tas continetur: b) ac propterea hoc iudicium ad ea ar-
bitria referebatur, in quibus adderetur: EX FIDE BO-
NA: cuius arbitrii vim & effectum mox in Actione Fi-

A 3

ducia

tanquam proprio nomine boni viri appellantur. Ita VE-
NVLIVS in L. 137. §. 2. D. de verb. oblig. Et magis est, ut
totam eam rem ad indicem, id est, VIRYM BONVM re-
mittamus.

a) De Iure Nat. & Gent Lib. V. cap. 10. §. 8.

b) CICERO de Offic. Lib. III. cap. 17.

6 DE PACTO FIDUCIAE

ducia videbimus. Imo vero, quoniam in hoc iudicio communi isti bona fidei Actionum formulæ addebatur: VT INTER BONOS BENE AGIER OPOR-TET: erat illud bona fidei iudicium per excellentiam, & quia de fide fracta a) agebatur, si quis eo esset damnatus, infamia notabatur. Ita CICERO: b) Si qua enim sunt privata iudicia summae existimationis, & pene dicam capitum, tria hæc sunt, FIDUCIAE, Tutela, Societas: æque enim perfidiosum & nefarium est, fidem frangere, quæ continet vitam, & pupillum fraudare, qui in tutelam pervenit, & socium fallere, qui se in negotio coniunxit. Neque dubitandum est, in Edicto Praetoris de his qui notantur infamia c) extitisse: QVI PRO SOCIO, TUTELAE, MANDATI, DEPOSITI, FIDUCIAE, SVO NOMINE, NON CONTRARIO IUDICIO, DAMNATVS ERIT: ubi FIDUCIAE mentionem TRIBONIANI manus expunxit.

S. V.

- a) *Iudicia de fide mala*, tutela, mandati, pro socio, FIDUCIAE, appellat CICERO de Nat. Deor. Lib. III. c. 30.
 b) *Pro Q. Rose, Comodo c. 6.* Et in Orat. pro Cæcina c. 3. Qui per tutelam, aut societatem, aut rem mandatam, aut FIDUCIAE rationem fraudavit quemquam, in eo, quo delictum maius est, eo poena est tardior. Est enim TURPE IUDICIVM, & FACTO quidem TURPE. Quamvis FREHERVS de infamia Lib. III. cap. n. §. 12. solum depositi iudicium his locis intelligendum putet. Rechte vero cenfet Vir eruditissimus IOACH. POTGIESER de indole & natura pignorum. Secl. II. cap. 1. §. 4. Cum Fiducia in genere considerata per excellentiam esset bona fidei, non video, quare iudicium Fiducia, quatenus pro pignore eiusmodi sumitur, haud aque famosum fuerit, quam tutela, aut societas, aut depositi. Cui non obest, quod pignoratitia actio famosa non dicatur; quia hoc intelligendum est de illa pignoris specie, qua a fiduciario pignore multum discrepat.
 c) *L. i. D. de his qui not. infam.*

§. V.

Vt vero Fiduciæ iudicium plenius exponamus, ACTIO FIDUCIAE ex turam atque formulam investigabimus. Vbi quidem Lega XII. nihil morabitur erroneam eorum opinionem, qui Fiduciam nihil aliud, quam ipsam hypothecam esse perrum de- suasi, Actionem Fiduciæ non aliam, quam hypothecari- ducitur.
 Actionis, qua iudicium hoc intentaretur, originem, na-
 turam atque formulam investigabimus. Vbi quidem Lega XII.
 nihil morabitur erroneam eorum opinionem, qui Fiduciam nihil aliud, quam ipsam hypothecam esse perrum de- suasi, Actionem Fiduciæ non aliam, quam hypothecari- ducitur.
am Actionem fuisse, a) sicut error ab errore gignitur, existimarentur. Satis enim superque ostensum est Exer- citatione priore, Fiduciam neque pignus, nec hypothe- cam, sed mancipationum in variis negotiis civilibus solennium fuisse accessoriam de remancipando con- ventionem. Enimvero non in contractibus tantum, illis præfertim, a quibus præsidium vitæ humanæ pen- det, & qui sunt quoad originem Iuris Gentium, fidem sanxerant Romani veteres: b) sed in Legibus XII. Ta- bularum quoque Decemviri Tabula VI. scripserant:
**QVVM NEXVM FACIET MANCIPIVM QYE,
 VTI LINGVA NVNCVPASSIT, ITA IVS ESTO:
 SI INFICIAS IERIT, DVPLIONE DAMNA-
 TOR: c) quia Lex non a Græcis petita, nec ab Her-
 modoro dictata, aut a Decemviris Legum scribenda-**
 rum

a) Quam opinionem post SALMASIVM in primis tueri voluit
IO GE. GRAEVIVS in prefat in Tomum II. Thes. Anti-
 quit. Rom. ubi SIGONIVM reprehendens scribit: ACTIO
 FIDUCIAE veteribus Ictis dicebatur, quæ posteris est A-
 CTIO HYPOTHECARIA. Etpaulo post: Est igitur ACTIO
 FIDUCIAE, quæ debitor repetit hypothecam, aut pignus a
 creditore pecunia soluta, quæ ab Imperatore ACTIO QVA-
 SI SERVIANA dicitur, quod ad instar SERVIANAE esset
 instituta, de qua multi in locis Icti in Pandectas. Quam
 rectius Vir docissimus, sed non iuriis, & reprehensionem
 SIGONII & Actionis hypothecaria descriptionem omisisset?

b) GELLIVS Noz. Att. Lib. XX. cap. t.

c) Vid. IAC GOTHOFREDVS in probation. ad Leges XII. Tabu-
 larum, ad Tab. VI.

rum inventa, sed ex æquissimis illis Servii Tullii legibus adscita & in XII. Tabulas translata videtur. Ea lege iubebatur pactum, in mancipatione dictum, omnino ratum sanctumque esse, ac iniciatorem dupli poena coerceri. Quamvis enim, CICERO NE auctore, a) sciantus, verba illa: VTI LINGVA NVNCV PASSIT, de legibus emptionum venditionum & de qualitatibus rerum a venditore dictis, nominatis promissive, intellecta fuisse: ipse tamen CICERO & FESTVS b) legem istam in genere de dictis promissive in mancipationibus explicarunt: luculentissime vero CAIVS, optimus Legum Decemviralium interpres, Libro III. ad Legem XII. Tabularum commentatus erat his verbis: IN MANCIPATIONIBVS (pro quo verbo TRIBONIANVS substituit traditionibus, ut IAC. GOTHOFREDVS docet) c) RERVM QVODCVNQVE PACTVM SIT, id valere manifestum est. Ex hac igitur Lege pactum Fiducia mancipationibus adiectum, usu & necessitate ob rationes, quas inspexi mus, civiles ita exigente, Actione munirum agnoverunt Prudentes, ac proinde formulam Fiduciae & Actionem singularem dictarunt, quemadmodum & aliis in rebus Legem istam interpretatione sua protulerunt. d)

§. VI.

Actio Fiduciae quomodo effe potuerit ex pacto eiusque Formula.

Hæc origo actionis Fiduciae, neque amplius querendum nobis videtur, quomodo ex pacto potuerit Actio esse? Agebatur enim ex pacto venditioni rerum mancipi per as & libram i. e. mancipationi adiecto: idemque a Iurisconsultis merito prolatum ad Fiduciam addi-

a) De Offic. lib. III. c. 16.

b) v. Nuncupata.

c) In Notis ad Tab. VI.

d) Vid. Exercit. I. §. 7. not a) ubi, familie mancipationem occasione huius legis a Prudentibus inventam, diximus.

additam cessioni in iure, quæ in rebus nec mancipi adhibebatur, tanquam communis rerum mancipi & nec mancipi alienandi modus. Et quidem sicuti pactum Fiduciaæ continebat promissionem de remancipa, aut retro cedenda re alteri mancipata, sive in iure cessa: ita Actione ex hoc pacto principaliter atque directo agebatur ad remancipandam, aut retro cedendam rem illam. Quapropter Actionis formula, quantum coniicere datur, fuisse videtur talis: AIO, TE MIHI FVNDVM, QVI EST IN AGRO, QVI SABI-
NVS VOCATVR, QVEM TIBI MANCUPAVI,
(vel, IN IVRE CESSI APVD PRAETOREM) RE-
MANCUPARE (RESTITVERE) OPORTERE, VT
INTER BONOS BENEAGIER OPORTET ET SI-
NE FRAVDATIONE.^{a)}

§. VII.

Actionis
mancipanda restituendave re, alteri mancipata: con-
stat hinc, Actionis illius propriam intentionem fuisse
ut remanciparet sive retro in iure cederet reus actori
rem, qua de ageretur. Non enim, finita & cessante cau-
sa mancipationis, ipso iure resolvebatur dominium at-
que revertebatur res ad priorem dominum: id quod
non tantum auctoritate PAVLI offendimus, b) sed con-
firmat hoc etiam generalis Iuris antiqui regula, secun-
dum quam nihil tam naturale est, quam eo genere

B

quid-

*nibius na-
tura. Erat
alii dire-
cta, alia
utilis.*

a) SIGONIUS de Iudiciis Lib. I. cap. 21. Actionis Fiduciaæ for-
mulam ita concepit: AIO TE MIHI DOMVM ILLAM,
QVAM TIBI MANCUPAVI, VT MIHI REMANCIPARE,
VT INTER BONOS BENE AGI OPORTET, SINE FRAV-
DE REMANCIPARE OPORTERE.

b) PAVLVS Lib. II. Sent. Tit. 13. §. 3. Vid. Exercit. I. §. 17.

quidque dissolvere, quo colligatum est: a) ideoque in solenni Fiduciae formula ita conceptum fuit pactum: *Ego tibi rem meam mancupo, ut mihi eam remancupes.* Continebat vero haec Actio simul præstationes ex negotio bona fidei, cui fiduciaria mancipatio accesserat, provenientes: unde factum est, ut præter DIRECTAM ACTIONEM, qua mancipator principaliter agebat ad remancipandum, esset quoque CONTRARIA FIDUCIAE ACTIO, b) qua emptor fiduciarius repereret impensas, quas in commodum mancipatoris, rei vel conservandæ vel augendæ cauſa, fecisset. Ita enim diserte PAVLVS: *Si creditor rem fiduciariam fecerit meliorem, ob ea recuperanda, que impedit, iudicio fiduciæ debitorem habebit obnoxium.* c)

§. VIII.

DIRECTA igitur Actione Fiduciae non solum agebatur ad remancipandum, sed etiam ad præstandum ORECTA ad mne id, quod ex bono & aequo, pro natura negotii five quid ten- contractus, cui fiduciaria mancipatio accesserat, debe dat? retur. Hinc etiam, si creditor distraxisset rem Fiduciae datam,

-
- a) L. 35. & 153. D. de Reg. Iur. Itaque exemplum Fiduciae addendum est illis variarum rerum contrahendarum distractarumque ritibus *ἀντισέφοις*, quos illustrat R. A. D. FORNERIVS Rer. quotidian. Lib. I. c. 9.
- b) Duplicum Actionem Fiduciae, directam & contrariam, observavit iam & descripsit CVIACIVS ad PAVLI Sent. Lib. II. Tit. 13. §. 7.
- c) PAVLVS I. c. Dubitandi rationem, que inde oritur, quia creditor fiduciæ dominus esset & mancipio haberet, removunt IAC. GOTHOFREDVS ad Iun. C. Th. de commissor. ref. p. 253. & SCHVLTINGIVS ad l. I. PAVLI. Nimirum quia creditor non esset rei fiduciæ dominus incommutabilis, & occasione bona fidei contractus impensa factæ essent in debitoris commodum, ratio bona fidei exigit, eum inde obligari.

EXERCITATIO II.

ii

datam, de hyperocha, a) five de superfluo debitor agebat adversus creditorem, sicuti residui petitio illi supererat, si creditor minoris vendidisset. b) Verum potissima dispectio est, quomodo fructus rei fiduciariæ, quomodo damna dolo, culpave data in Fiducia iudicium venerint, & qua singulorum fuerit habita ratio? Ac de fructibus quidem & accessionibus pignoris fiduciarii diximus Exercit. I. §. XIX. unde constare poterit, nisi pactum de lucrando fructibus aut accessionibus intervenisset, in Fiducia iudicio una cum re fuisse restituenda eius commoda & augmenta, propter resolutam dominii causam. Nec de dolo erit, quod addamus, ex quo, suo nomine condemnatum, infamiam secutam esse, nullam habet dubitationem. c) Plus vero difficultatis est in definienda culpa & periculi præstatione, quam in primis utilem fuisse rem suam sub Fiducia pacto mancipantibus, atque mancipationum harum tam frequentem in variis contractibus usum attulisse, nuper observavimus. d)

§. IX.

Quid enim? omnem culpam, omne rei periculum præstissime depositarium, creditorem, conductorem, contra o-
quomodo cum æquitatis & iuris ratione confistere po- mnis cul
test? Itane vero amico debuit officium suum esse adeo riculi
molestum, & damnoſa rei depositæ custodia? Quam præfatio- nem obie-
periculosa illa cautio & securitas creditoris in pignore, etta.
quo, five culpa, five casu, pereunte, simul creditæ pe-
cunia iacturam ille faceret? Quam dura conductoris
alienæ rei periculum sustinentis conditio? An vero fi-

B 2

des

a) Ut vocat TRYPHONINVS in l. 20. D. qui pot. in pign. de quo verbo ex Pandectis Flôrentinis restituto, cum antea legeretur pro eo hypotheca, vid. CVIACIVS Observat. Lib. IV. c. 25.

b) PAVLVS Sent. Lib. II. Tit. 13. §. 1. Vid. ibi CVIACIVS.

c) Vid. supra §. IV.

d) Exercitatione I. §. XI.

des illa singularis & exuberans iniquitatis tantæ potuit esse causa? Et quomodo tam periculosa conventio non potuit homines abstergere a fiduciariis illis mancipatiobus, quas tamen apud Romanos diximus suisse frequentissimas? Anne rectius statuetur, auctore MODESTINO: a) *In Fiducie iudicio dolum & culpam*, i. e. levem tantum, *deduci*, adeoque medium solum diligentiam præstari: *quia utriusque contrahentis utilitas intervenit*: quam idem Iurisconsultus rationem subiicit, neque dubitare licet, eum culpæ nomine tantum intelligere culpam levem, quia eadem verba simul & coniunctim dicit de Fiduciæ iudicio & de rei uxoriæ actione, in qua de levis tantum culpæ prestatione actum esse, satis constat? b)

§. X.

*Qua di-
hauntur.*

At enimvero statim liquebit, nihil adversari æquitati, atque cum ratione iuris antiqui optine convenire, si dicamus, ubi possessor fiduciarius rem ultro restituerisset per remanicipationem, aut in iure cessionem, ab eo damnum in re factum non ultra culpam ex contractu, qui mancipationi causam dederat, præstari solitam, sarcinendum suisse: c) quodsi vero iudicio Fiduciæ ad restitutionem rei fiduciariæ compellendus fuerit, eum omnis culpæ nomine condemnatum esse: si res ipsa interiisset casu, eam periisse domino, scilicet ei, in cuius dominium venerat per fiduciariam mancipationem. Neque enim dominium illud per mancipationem eiusmodi

a) Collat. LL. Mosaic. & Roman. Tit. X. §. 2. Sed vid. infra §. XIX.

b) L. 17. D. de tur. dor. L. 18. §. 1. & L. 66. pr. D. Solut. matrim. dos quem. pet. Vid. GE. BEYERI Diff. de doce a plebe tumultuante direpta Licinia restituenda, cap. 2. §. 33. NOODT Comment. ad Pand. tit. Solut. matrim. p. 527.

c) Quia per remanicipationem, aut in iure cessionem resolutum iam dominium atque priori domino, qui sub Fiducia alienaverat, restitutum erat. Vid. Exercit. I. §. 18.

modi translatum fuisse tantum imaginarium, appareat ex illius effectibus, Exercitatione prima recensitis. a) Iam vero id nemini durum nimis aut iniquum videbitur: si ex conventione speciali res deposita solet esse periculo eius, apud quem deponitur; b) si alias partem inter contrahentes, ut amissio pignorum liberet debitorem, facit, ut creditor pignora, quæ fortuito casu interierint, praestare compellatur; c) si pacto, quo fundum quis ita locavit, ut etiam si quid vi maiori accidisset, hoc ei praestaretur, standum est; d) si periculum, ab artifice receptum, eius est; e) si ad conductorem operis etiam periculum vis maioris pertinet ex pacto: f) ea que pacta neque iniqua, nec, quasi contra iuris formam facta, irrita dici possunt, suntque eadem, ut Iurisconsulti observarunt, usu frequentissima: g) nemini, inquam, id iniquum, aut iuris rationi adversum videri poterit, eum, qui per mancipationem, transferendi dominii iure Quiritium proprium in rebus mancipi modum, in se derivari dominium passus esset, rei lux periculum sustinuisse, h) atque adeo, si creditor esset, non recepisse pecuniam creditam, si conductor, summam, qua rem sibi mancipatam aut opus redemisset,

B 3

fol-

a) §. XVII. & XIX. Add. STRAVCH. de Oppignor. rer. Imp. c. 2. §. 1. GVNDLING. de iure oppignor. territor. §. 67.

b) L. i. §. 35. D. depositi.

c) L. 6. C. de pignor. act.

d) L. 9. §. 2. D. locat.

e) L. 13. §. 5. D. end.

f) L. 36. D. eod. Vid. V. C. EV. OTTO Diff. de Praestas. cas. folit. insolit. & insolentif. c. 2. §. 5. seq.

g) L. i. §. 35. D. depos. L. 23. D. de Reg. Iur.

h) Qui enim securitatis aut commodi sui causa voluit esse dominus, non potuit noluisse periculum, quod est domini. Conferantur, quæ GVNDLINGIVS pro aquitate iuris Saxonici periculum omne in creditorem pignoratuum conferens, contra imaginariam Doctorum iniquitatem, disputavit in sched. de iure oppignor. territor. §. 83.

solvere condemnatum esse, si depositarius, eum pro re deposita pretium restituisse, qui propterea ex pacto adiici solito fructus rei lucratus esse videtur eiusque proprio damno perisse rem depositi causa ipsi mancipatam, si eam accepisset forte ab amico in militiam, aut per periculosa loca ituro, hac lege, ut, cum is rediret, ei rem remaniciparet, non revertente amico, perpetuo iure sibi retineret.

§. XI.

Vt omnis culpa praestanda esset a possessore fiduciario, rem ultro non restituente, singularis fides & sanctitas Fiducia poscebat, simul vero hoc ita ferebat ipsa vis dominii veri utique & perfecti in fiduciarium illum emptorem translati. Quodsi enim res fiduciata, casu & vi maiore perdita, ipsi perit tanquam domino suo: non potuit non ei qualiscunque, etiam quia a providentissimo ac diligentissimo patrefamilias caveri potuisset, culpa damno esse, qua scilicet determinata esset res in fiduciariam mancipationem deducenda. Meruit enim is hoc damnum ex duplice ratione: quod secundum fidem conventionis illico rem non restituerit ab amico compellatus, & quod per remanicipationem aut in iure cessionem non statim ressolverit atque a se removerit periculosa dominii causam. Imo vero sanctissima pacti fides efficit, ut fiduciarius possessor, qui damnum culpa lata vel leví datum ultro non reparasset, etiam in minimis rebus, tanquam litigator temerarius infamia notaretur. a) Non minus enim turpis culpa esse poterat in Fiduciaz quam in mandati iudicio, cum utrobique duas res sanctissimas, ut CICERO ait, b) amicitiam violaret & fidem: nam neque

- a) Quod CVIACIVS observavit in not. ad §. 2. Inst. de pan. temere litigantium.
 b) Orat. pro Sex. Roscio. c 39. & c. 40. Ad cuius fidem quis confugiet, cum per eius fidem leditur, cui se commiscribit?

que vel mandat vel res suas committit quisque fere,
nisi amico, nec credit, nisi ei, quem fidelem putat. Quippe in privatibus rebus, si quis rem non modo malitiosus
gesisset, sui questus aut commodi causa, verum etiam
negligentius, eum maiores sumnum admisissè dedecus
estimabant: quare in minimis privatisque rebus etiam
negligentia in crimen, iudicique infamiam revocabatur.

§. XII.

Actio Fiduciae ex pacto de restituendo dabatur etiam heredibus debitoris, & adversus creditoris heredes. *Actio Fi-*
dicia da-
Quod enim PAVLVVS a) dixit: Hereditibus debitoris ad- batur eti-
versus creditorem, qui pignora vel fiducias distraxit, nul- am hered-
la actio datur, nisi a testatore inchoata ad eos transmis- dibus &
sa sit: id de actione, qua ageretur tanquam ex pigno- aduersus
re vendito v. c. ad hyperocham, intelligendum esse, CV-
IACIVS b) & SCHVLTINGIUS c) docuerunt. Hæc
enim actio requirebat, ut is, a quo transmitteretur, eam
adquisierit, ratam habendo venditionem, quod debitor
fecisse videbatur, si pretii nomine cum creditore ex-
periaretur: ante ratihabitionem vero actio non fuit, er-
go nec potuit transmitti in heredem, nec post mor-
tem debitoris nasci ex heredum approbatione. d)
In heredes creditoris Actionem Fiduciae disertis verbis
statuit PAVLVVS: e) Si creditor rem fiduciae datam
uni ex heredibus vel extraneo legaverit, adversus omnes
heredes Actio Fiduciae competit. Ad quem locum CV-

IACI-

a) Sent. Lib. II. Tit. 17. §. 12. quem locum ex Consultatione veteris Iurisconsulti incerti, quæ in SCHVLTINGII Iurisprud. Ante-Justin. extat p. 8u. restituit CVIACIVS.

b) Observat. Lib. VII c. 26.

c) Ad PAVLI Sent. d. t. not. 32. p. 296.

d) Propter regulam juris: Ab herede actionem non incipere, quæ non competierit testatori: de qua vid. IAC. GOTHO-
FREDVS ad l. 8. C. Theod. de div. Rescr.

e) Sent. Lib. II. Tit. 13. §. 6.

IA CIVS notavit, hanc Actionem, ut pigneratitiam, a) in heredes dari, cum sit ex contractu. Et quoniam hoc nihil dubii habet, PAVLVS id solum explicandum censuit, Actione Fiduciae de re uni ex heredibus prælegata, vel etiam extraneo legata, oblatis nummis restituenda, non tantum eum, cui prælegata est fiducia, sed omnes creditoris heredes teneri: siquidem nec ille, quatenus prælegatum accepit, sed quatenus heres factus est, nec extraneus, qui nudus est legatarius, sed heredes, & inter eos quoque coheres, cui est prælegatum, conveniuntur.

§. XIII.

Actio Fiduciae cessabat, pignore iusti venditionis

Quod speciatim ad pignoris Fiduciam porro attinet, Actio Fiduciae debitorum non competebat, b) si pignus est a creditore iuste venditum. Iusta vero venditio, nisi vulgare pactum c) de vendendo palam interpolatum fuisset, tunc demum erat, si creditor debitori ante ter denunciaverat, ut solveret, & ab hoc erat cessatum, idque obtinebat perinde, sive nihil de distractione convenisset, sive convenisset inter credito-rem & debitorem, ne distraheretur pignus fiduciatum. Vtique enim casu denunciationem requirit PAVLVS, de illo scribens: d) Creditor, si simpliciter sibi pi-gnus depositum distrahere velit, ter ante denunciare debitori suo debet, ut pignus luat, ne a se distrahat: de altero casu sic definiens: e) Si inter creditorem & debito-rem convenerit, ut fiduciam sibi vendere non liceat, non solvente debitore, creditor denunciare ei solenniter potest, & distrahere: nec enim ex tali conventione fidu-ciae

-
- a) *L. 10. C. de pign. act. CVIACIVS ad PAVLI Sent. l.c.*
 b) Nimurum Actio Fiduciae de restituenda re fiduciata: sed com-petebat debitori tantum Actio pigneratia ad hyperocham, *I. 6. §. 1. & I. 7. D. de pign. act. I. 1. & 4. C. cod.*
 c) Vti dicitur in *I. 4. C. de pign. act.*
 d) *Sent. Lib. II. Tit. 5. §. 1.*
 e) *Sent. Lib. II. Tit. 13. §. 5.*

cic actio nasci potest. Priore loco *pignoris depositi*, quod a Fiducia distinxit alias, a) tantum mentionem facit PAVLVS: ut proinde vera videri possit IAC. GOTHOFREDI b) sententia, in Fiducia nullam denunciationem necessariam fuisse, quia creditor dominus rei per mancipationem factus iure suo distinctionem posset peragere. Sed merito tamen SCHVLTINGIVS V.C. monuit, c) nimis durum hoc esse, cum creditor quidem fuerit dominus, sed revocabili iure, ac iustum & hic rationem adfuisse debitorem admonendi, adeoque pignus & Fiduciam paris videri conditionis. Neque vero obstat, quod PAVLVS, ubi de Fiducia loquitur, tantum eo casu denunciationem exigit, cum pactum placuerit de non vendendo. Nam nec VLPIANVS d) in altera specie, si de pignoris nudi alienatione nihil convenerit, trinæ denunciationis meminit, quam tamen omnino necessariam esse, tradit PAVLVS. Morem hunc plane fuisse Iurisconsultis, ut, præteritis iis, quæ minus haberent dubitationis, extricarent potissimum has species, de quibus magis posset ambigi, V. C. GER. NOODT e) observavit, & nos tale exemplum ex ipso PAVLO in §. præcedente vidiimus. Et trina quidem denunciatione opus fuisse, non solum ex VLPIANI & PAVLI locis, qui de nudo pignore tractant, colligendum est, sed etiam in isto PAVLI posterius adducto loco talen numero denun-

C cia-

-
- a) In rubrica Tit. 4. Sent. Lib. II. de commodato & deposito pignore, Fiduciave: ad quam vid. SCHVLTINGIVS.
 b) In Commentar. ad L. un. C. Theod. de Commissor. rescind. p. 254.
 c) Ad PAVLI Sent. Lib. II. Tit. 5. §. 1.
 d) L. 4.D. de pign. act. Conf. NOODT Comment. ad tit. D. de pignorib. & hypoth. p. 442
 e) Probabil. Iur. civ. Lib. I. cap. 5.

ciationem requiri, cognoscimus ex ipsius Interpretate, qui verba, *denunciare solenniter*, explicat: *post irinam conventionem*, i. e. *admonitionem*, quo nomine in altero loco a) usus est. Vnde conjectura subnata est laudatissimo SCHVLTINGIO, forte scriptum olim fuisse: *solenniter*, i. e. *solenniter iter*, eique de hoc ingeniosissimo, forte & verissimo invento applaudit NOODTIVS. b) Frustra vero & sine auctore GVIL- RANCHINVS c) contendit, semper tria denuncia- tione opus esse, quotiescumque denunciatio requiritur: falsum quoque est, quod Viro insigni PETRO FA- BRO d) in mentem venit, denunciations has esse quasi actus legitimos, & hinc neque per alium fieri posse, neque recipere tempus vel conditionem.

§. XIV.

Nec *Fiducia iudicio* te-
nebatur, qui liberum ho-
minem noxae de-
ditum manumi-
serat.

Quid vero est, quod pariator Legum Mosaicarum & Romanarum ex PAPINIANI libro II. Definitionum refert: e) *Per hominem liberum noxae deditum*, si tan- tum *acquisitum sit*, quantum *damnum dedit*, manumis- tere cogendum esse a *Prætore*, qui *noxae deditum accepit*, sed *Fiducia iudicio non teneri*? Crucem fixit hoc fragmentum Viro sagacissimo PETR. PITHOEO, f) qui ad aliena dilapsus, subtilioribus conjecturis, quibus hunc locum explicare prater rem tentavit, sese tandem extricare non potuit. Nihil vero aliud significatum fuit a PAPINIANO, quam, liberum hominem noxae datum, si per eum tantum acquisitum esset, quantum damni

a) Lib. II. Sent. Tit. 5. §. 1.

b) Comment. ad D. I. c.

c) Variar. leſſ. Lib. III. cap. 14.

d) Semelv. Lib. II. cap. ult.

e) Tit. II. §. 3.

f) In not. ad Collat. LL. Mof. & Rom. l. c.

damni dederat, quoniam actor id iam consecutus, quod in condemnatione fuerat, manumittendum suis-
fe, cogente Prætore eum, qui deditum acceperat, quam-
vis nulla interposita esset, ut in emancipatione, Fidu-
cia, ac proinde is ad remancipandum Fiducia iudicio
non esset obligatus. Neque enim per manumissio-
nem iniuria siebat ei, qui hominem dedendo abiecerat,
nec usum hic Fiducia pactum habere, ut in eman-
cipatione, poterat, cum eiusmodi manumissor liberū
hominis ius patroni non consequeretur: quia liber ho-
mo manumissus non siebat libertina conditionis, sed in-
genitatem recuperabat a) haud secus, ac filius a paren-
te venumdatus. Et acute coniicit V. C. SCHVLTIN-
GIVS, b) filium a patre noxæ deditum & manumis-
sum recidisse iterum in patriam potestatem, non item
ceteros liberos, præter filium, qui, auctoribus CAIO C)
& VLPIANO, d) una mancipatione manumissione-
que sui iuris siebant.

§. XV.

Atque hæc sunt, quæ in tanta huius argumenti, a
Viris Doctris tam varie intellecti, obscuritate ex paucis
veterum testimoniis & fragmentis eruere licuit ^{ad dis-}
^{quiftio-}
nunc operam, ut præcipuis quibusdam IURIS IUSTI-
NIANI locis ex his, quæ de Fiducia disputavimus, lux ^{tempore} ^{et aucto-}
adfundatur. Quod ut recte atque ordine agamus, vi-
dendum prius erit de tempore & auctore, quo pactum ^{re sublati}
hoc

C 2

a) QUINTILIANVS Inſt. Orat. Lib. V. c. 10. Lib. VI. c. 3. & De-
clam. CCCXI. CVIACIVS Observation. Lib. XIII. c. 9. SAL-
MASIVS de modo uſur. c. 17. & 18. Conf. Amplif. HEINEC-
CIVS Antiquit. Iur. ad Tit. Inſt. de Nox. Act. §. 3.

b) Ad Collat. LL. Moſ. & Rom. I. c. not. 12.

c) Inſt. Lib. I. Tit. VI. §. 3.

d) Fragm. Tit. X. §. 1. Vid. Exercit. I. §. IV.

hoc olim celeberrimum ab usu & consuetudine sublatum fuerit: unde factum, ut Fiduciaz nomen in omni Iustiniana Iuris Romani digestione nullo loco compareat.

§. XVI.

Necessitas pignoris fiduciarii minor post Aditionem Hypothecariam introductam. Equidem postquam de pignore quoque Actio in rem Iure honorario prodata erat, minor fuit necessitas, per mancipacionem aut cessionem fiduciariam dominium in creditorem transferendi, ut pignus vindicare posset a quoconque possessore. Neque dubitandum est, cum semel hypothecarum utilitas placuisse, rariorem inde factum esse fiduciarii pignoris usum, a) utpote plurimum habentem incommodi: dum non erat semper, nec ubique copia quinque civium Romanorum puberum, qui tanquam testes idonei, una cum libripende, requirebantur, ut mancipatio fieri posset: b) difficilior vero in iure cessio, quæ ius & Praetorem desiderabat: c) accedit, quod mancipatio tantum in rebus mancipi & inter cives Romanos Larinosque colonarios & Latinos Iunianos obtineret, non etiam in rebus nec mancipi, neque inter peregrinos, nisi quibus commercium datum esset. d)

§. XVII.

Fiducia non abrogata Lege CONSTANTINI M. Nec tamen ante IVSTINIANI tempora solennitas Fiduciaz omnino ex usu recessit, quod SALMASIO

-
- a) SCHVLTING. ad PAVLI Sent. Lib. II. Tit. 13. §. 1. NOODT Observation. Lib. II. c. 8.
 - b) CAIVS Inst. Lib. I. Tit. 6. apud BOETHIVM Lib. III. Commentar. in Topic. CICERONIS, VLFIANVS Fragm. Tit. XIX. §. 3.
 - c) CAIVS Inst. Lib. II. Tit. 1. apud BOETHIVM l.c. VLFIANVS l.c. §. 9.
 - d) VLFIANVS ibid. §. 4. sequ.

SIO a) aliisque viris doctis visum, aut sublata est Constitutione CONSTANTINI de lege commissoria rescindenda, b) ut CVIACIVS c) præserim creditur suaque auctoritate alios induxit, legem commissoriam omni pignori fiduciario semper coniunctam fuisse, atque adeo Fiduciam pignoris una cum lege commissoria pignorum a CONSTANTINO abolitam putans, cui IAC. GOTHOFREDVS d) & ANTON. SCHVLTINGIVS e) satisfecerunt. Fiduciam enim, sive pignus fiduciarium a lege commissoria plurimum differre, neque hanc illi naturaliter inesse, vidimus supra: f) ergo CONSTANTINI lex ad Fiduciam trahi non potest: quid? quod Fiducia, etiam in pignoribus contracta, nullum odium, nulla captio, nulla tanta asperitas fuit, g) qua causa legis commissoria in pignoribus sublata ab Imperatore indicantur. Præterea vero post CONSTANTINVM M. in Constitutione ARCADII & HONORII h) Fiducia pignorum exercitis verbis confirmatur, & scriptores post illam attatem, D. AMBROSIVS i) & SIDONIVS APOLLINARIS, k) Fiduciae, tanquam rei adhuc vigentis, mentionem fecerunt.

C 3

S. XVIII.

- a) *De modo usurarum c. 13.*
- b) *L. un. Cod. Theod. de commissor. resc. L. ult. C. de pact. pign.*
- c) *Ad PAULI Sent. Lib. II. Tit. 13. rubr.*
- d) *Ad d. L. un. Cod. Theod. p. 253.*
- e) *Ad PAULI Sent. l.c.*
- f) *Exercit. I. §. XX.*
- g) *Quamvis dissentiat FRANC. BALDVINVS in vita Papiniani, p. 204. edit. Halens. Sed haec est BALDVINVS in errore vulgaris, Fiduciam speciem quandam legis commissoria fuisse.*
- h) *L. 9. C. Theod. de infirm. his, qua sub tyrann.*
- i) *Libr. de Tobia c. 12. Hypothecas flagitat, pignus usurpat, Fiducias vocat.*
- k) *Lib. IV. epist. 24. Pecuniam mutuam posulavit, impetravit que, nibil quidem loco Fiducie pignorisque, vel argenti sequestrans, vel obligans prædiorum.*

§. XVIII.

Fiducia simul cum solenni mancipatio a IUSTINIANO sublata in usu esse desit. Quare nihil certius est, quam pactum Fiducia, tanquam accessorium mancipationum in variis negotiis civilibus adhibitarum, cum ipsis mancipationum solennitatibus & differentiis rerum mancipi & nec mancipi a IUSTINIANO sublatis, a) evanuisse. Cumque idem Augustus etiam in emancipationibus liberorum venditiones illas in liberas personas figuratas omnemque veteris illius fiduciariæ mancipationis & remancipationis & manumissionis circuitum quiescere iussisset, huius Constitutionis virtute quoque voluit, ut emancipationes liberorum semper viderentur contracta Fiducia fieri: cum apud antiquos non aliter hoc obtinebat, nisi specialiter contracta Fiducia parens manumisisset. b) Hinc & CONSTANTINI quidem Constitutio de lege commissoria pignorum abolenda in Codicem IUSTINIANI relata, sed altera ARCADII & HONORII, qua Fiducia vigorem confirmatum diximus, omisso: imo vero TRIBONIANVS eiusque socii nullo Pandectarum vel codicis loco Fiducia nomen exta
re

a) L. un. C. de Usucap. transform. § de sublat. differ. rer. mancip. & nec mancipi. Neque putamus cum Cl. GUNDLINGIO, sched. de iur. oppign. territorii §. 74. ritus mancipationis & in iure cessionis tantum a IUSTINIANO sublatos fuisse, ipsam vero Fiducia conventionem remanisse. Cur enim, si abrogatis licet solennitatibus adhuc illa perduravit, ex omnibus Iurisconsultorum locis atque Imperatorum Constitutionibus in Pandectis & Codice doctissimus POTGIESER de indole & natura Pignor. sect. II. c. 1. §. 13. imo vero, quomodo mancipationibus sublatis accessorium earundem pactum remanere potuit?

b) L. ult. C. de emancip. liber. §. 8. Inst. de Legit. adgnatar. suc-
cessione.

re passi sunt, eo vel penitus deleto, vel, ubi de pignore fiduciario sermo esset, *pignoris* aut *hypothecae* vocalibus substitutis, atque hoc modo textus de Fiducia loquentes pignori accommodarunt.

§. XIX.

Neque tamen ita tolli potuit Fiducia, atque tam *Vestigia* studiose ex Iurisconsultorum Veterum fragmentis & *Fiduciae* Imperatorum Rescriptis eliminari, quin vestigia eius in variis Pandectarum & Codicis locis, cognoscere ac vel ut in *Pandectis*, ac *in L. 5. §. 2. Commodatis*, sequenti detur, quorum proinde aliquot extantiora scrutabimur atque cum natura Fiduciae a nobis determinata conferemus. In Digestis itaque primum modat, nobis occurrit locus **VLPANI**, ex Libro XXVIII. ad *Editum*: a) Sed ubi utriusque utilitas vertitur, ut in dolore, ut in pignore, ut in societate, & dolus, & culpa praefatur: ubi olim scriptum exitisse: *Vt in actione rei uxoriae, ut in Fiduciae iudicio*, satis perhibent verba **MODESTINI** ex libro *Differentiarum* secundo in *Collationem Legum Mosaicarum & Romanarum* relata: b) Sed in ceteris quoque paribus Iuris ista regula custoditur: sic enim & in *Fiduciae iudicio*, & in *Actione rei uxoriae*, & dolus & culpa deducitur; quia utriusque contrahentis utilitas intervenit: idque notarunt **PTR. PITHOEVS** c) & **WISSENBACHIVS**. d) Certe ambo isti loci adeo sibi sunt similes, ut **MODESTINVS** ex praceptoris sui e) traditis differentias de *præstatione dolii & culpa* in variis contractibus, petuisse utique videatur. Simul vero **VLPANI** verba, in Pandectis inter-

po-

-
- a) *L. 5. §. 2. D. Commodati.*
 - b) *Tit. X. §. 2.*
 - c) In *not. ad Collat. LL. Mof. & Rom. l. c.*
 - d) In *Emblemat. Tribonianii, ad b. l.*
 - e) Vid. **EVIL GROTIUS de Vitis ICtor. Lib. II. c. 12. §. 6.**

polata, ostendunt, per iudicium Fiduciaꝝ apud MODESTI-
NVM illud tantum iudicium, quo de damno in pigno-
ribus fiduciariis dato ageretur, significari, atque hoc
intellecto dubium illud resolvitur, quod ex MODESTI-
NI verbis supra a) fuit excitatum.

§. XX.

Vestigia Recte etiam laudatus modo WISSENBACHIVS obser-
Fiduciaꝝ vat, alio loco VLPIANI, ex eodem Libro XXVIII. ad Edi-
in L. 9. §. etum b), post verba: *Proprie pignus dicimus, quod ad*
2. & L. 35. *creditorum transit: hypothecam, cum non transit, nec*
§. 1. D. de *pignor. possessio ad creditorem: olim extitisse hæc: nec proprietas, ut in Fiducia.* Locum, uti hodie in Pandectis le-
gitur, mancum esse, quilibet videt. Deficere autem
verba illa, quæ WISSENBACHIVS restituit, compro-
bat etiam locus ex FLORENTINI Libro VIII. Inſtitu-
tionum: c) *Pignus, MANENTE PROPRIETATE*
debitoris, solam possessionem transfert ad creditorem: Vbi Iurisconsultum olim differentias inter Pignus, Fi-
duciam & Hypothecam proposuisset, ita, ut, in Pigno-
re transferri possessionem, in Fiducia vero etiam pro-
prietatem, in Hypotheca neutrum fieri, doceret, facile
sentiet, qui non sit naris obesæ. Idem itaque in ver-
bis hic adscriptis VLPIANVS docuerat: sed TRI-
BONIANVS utroque loco Fiduciaꝝ, a Domino & Prin-
cipe suo per solemnitates mancipacionum abrogatas
simil ab usu sublatæ, mentionem tanquam inutilem &
superfluam exulare iussit.

§. XXI.

Accedimus ad L. XI. D. de pignor. & hypoth. quæ
de-

a) Hac Exercit. §. IX.

b) L. 9. §. 2. D. de pignor. act. WISSENBACH. Emblem. Tri-
bon. ad h. l.

c) L. 35. §. 1. D. cod. tit.

desuntia est ex MARCIANI libro singulari ad Formulam hypothecariam, ubi §. 3. dicitur: *Iura prædiorum um Fiduciæ in L. urbanorum pignori dari non possunt: igitur nec conveni-ri possunt, ut hypothecæ sint.* Et elegans quidem est u. D. de Oblervario E M. MERILLII, a) servitutes etiam fi-
ducario pignore mancipari solitas fuisse creditori, con-tracta Fiducia, ut eam creditor soluta pecunia debito-ri remanciparet: credimus etiam , a MARCIANO scriptum fuisse: *pignori AVT FIDUCIAE dari non possunt: sed quod idem Vir acutissimus rationem hu-ius iuris in conditione servitutum urbanarum querit, quia hæ fuerint res nec mancipi, id non æque proba-ri potest.* Itaque hic locus erit disputandi quæstionem, in fine Exercitationis primæ delibatam, & cuius dili-gentius examen nos in præsentem opellam differre me-minimus.

§. XXII.

Quæstio est de servitutibus urbanorum prædiorum, *de servi-tu-
an & hypothecæ obligari & pignori dari nequeant, cum tuibus
in rusticorum prædiorum servitutibus utrumque fieri
possit? & quæ sint eius, quam in d. L. XI. §. ult. & eam
proxime sequente L. XII. MARCIANVS & PAVLVS diorum,
innuerint, differentiæ rationes?* Enimvero ma-gna eit Interpretum hac de quæstione diffensio. Non solum ACCVRSIUS & BARTOLVS b) existimarunt, servitutes prædiorum urbanorum vel ideo pignorari non posse, quia caussa earum perpetua, pignus vero temporarium sit: verum & CVIACIVS c) pignora-tioni servitutum urbanarum, præter istam Iuris Civilis rationem obstat monet alteram, quia servitutes hæ-

D non

a) Observation. Lib. VI. cap. 4.

b) In h. l. Confer. DION. GOTHOFREDVS ad eand. not. m).

c) Observation. Lib. XVI. c. 6. Et iam ante CVIACIVM ean-dem sententiam defendit FRANC. CONNANVS Commen-tar. Iur. Civ. Lib. IV. c. 14.

non sint æque vendibiles, ac rusticæ, & hinc inutile foret earum servitutum pignus, cum alium vicinum emptorem non sit inventurum, inutile vero existat pignus, quod, non solvente debitore, alii vendi non potest. a) EM. MERILLIVS eam substituit, quam iam indicavimus, rationem: quia servitudes rusticæ suerint res mancipi, non urbanae: ergo illas tantum fiduciario pignore mancipari potuisse. Primus autem a recepta opinione recessit FRANC. DVARENVS b) atque servitudes prædio sive rusticæ, sive urbano iam constitutas, indistincte pignerari non posse statuit. Cum enim prædiis coharent, c) adeoque dari, i. e. in creditorem transferri, nisi pignerato fundo, cui debentur, non possint: frustra talem conventionem fieri, si creditor a debitore hypothecam avocare non posset. d) Hanc rationem tradere MARCIANVM, quamvis de urbanis tantum expresse loquatur. Aliam esse causam servitutis titulo pignoris quodammodo constituendæ, a domino prædii, eodemque debitore, tantisper dum fuerit exfolata pecunia, quam debet creditori. Hoc fieri ita posse, non quidem summò frite quoque iure, e) sed propter utilitatem, idque PAVLVM cum POMPONIO f) pronunciare. Et hic iterum nullam esse inter urbanas & rusticas servitudes differentiam, quamvis apud PAVLVM rusticarum tantum mentio fiat, loco exempli. Nam eandem esse in urbanis rationem, eum haec pariter ac rusticæ precario concedi possint, auctore CAIO. g) At vero CIVIS

a) L. 4. D. de pign. act. l. n. C. de diſtr. pign.

b) Disputation. annivers. Lib. II. c. 13.

c) L. 23. §. 3. L. 24. D. de serv. præd. rust.

d) L. 16. §. 5. D. de pignor. & hypoth.

e) Quia servitus ad tempus constitui non potest, L. 4. D. de Servit. L. 28. D. de Servit. urb. præd.

f) L. 12. D. de pignor. & hypoth.

g) L. 3. D. de precar.

CIVS differentiam inter utrasque servitutes perquam evidenti calumnia eludi his, qua DVARENVS disputat, acriter contendit. Non incidissent, inquit, in istas salebras, strariones iuris tenuissent. Haec sunt: primum, in hac quæstione usumfructum separari a ceteris servitutibus, ut qui potest vendi, locari & pignerari a domino in corpore, quod eius est proprium, imo & ab usufructuario, cuius est solum ius utendi fruendi alieno prædio: a) quia fructus est vel locare & pignori dare licere. b) Servitutes autem prædiorum rusticorum vel urbanorum a domino vel ab eo, cui debentur, et si vendi possint, locari tamen non posse: c) quia omnis locatio fit ad tempus, & servitus ad tempus constitui non potest. Quod vero servitus locari non potest, accipiendo esse generaliter, ut nemo, v. c. neque dominus, neque is, cui servitus debetur, servitutem locare possit. At contra tam a domino, quam ab eo, cui servitus debetur, servitutem rusticæ prædii pignori ponere posse: quia quasi fructus cuiusliber rei est sive corporalis, sive incorporalis, vel pignori dare licere. d) Aliam enim esse rationem pignoris atque locationis: cum hæc lex semper pignori insit, ut distrahi possit in perpetuum, saltum debitore trina denunciatione convento. Servitutem autem urbani prædii neque a domino, neque ab eo, cui servitus debetur, pignerari posse utiliter: & rationem differentia esse: ut sit utile pignus servitutis, non tantum necesse esse, creditorem habere prædium vicinum, sed etiam, ut huiusmodi pignus alii vicino distrahi possit. Atqui creditori habenti ædes vicinas, cui pignori concessum est ius tigni aut stillicidii

D 2

dii

a) L. u. pr. L. 15. pr. D. de pignor.

b) L. i. pr. L. ult. D. de usur.

c) L. 44. D. locat. cond.

d) L. ult. D. de usur.

dii immittendi, non alium esse vicinum, cui ea servitus usui esse possit: cum econtra ius prædii rustici alii vicino distrahi possit, idque forsan magno alium vicinum redemturum esse, cum possit uno itinere pluribus patere aditus in suos fundos. Denique argumentum a precario refellit C VIACIVS: quia precaria possessionis utilitas, non, ut ius pignoris, in distractione consistit; ideo summa ratione differentiam servitutum in precario non servari.

§. XXIII.

Ivit tamen LVD. CHARONDAS a) in DVAREN sententiam; eandemque amplexus est FRANC. BALDVINVS, b) & postea præclare confirmavit M. AVR. GALVANVS, c) in eo solum dissentiens, quod utrumque, MARCIANI & PAVLI, locum ad servitutis constitutionem pignoris contrahendi causam referunt ex intentione Compilatorum, qui hos textus, ut unam quæstionem tractantes, coniunixerint. Dominum itaque super suo prædio posse constituere pignus servitutis, non minus urbanæ, quam rusticæ, vel inde concludit, quoniam unusquisque potest prædium suum subiicere servituti, d) maxime si nihil desit ex his, quæ sunt alioqui necessaria, ut pignus aut servitus valide constituatur, si non ex rigore, saltem ex aquitate. Ergo cum servitutes ex aquitate ad tempus imponantur, auctore PAPINIANO, e) & sint in commercio, & facultate vendendi creditori data a debitore constitente, domini consensu vendantur, f) apparer, eas dicto modo pignori dari posse, & quidem non solum rusticas,

a) Verisimilium Lib. I. c. 5. seqq. 7.

b) De pignoribus, c. 12.

c) Dissert. Var. de Usufructu c. 39. n. 7. seq.

d) L. i. D. commun. præd. L. 21. C. mand.

e) L. 4. D. de servit.

f) arg. §. i. Inß. quib. alien. lic.

cas, quod evidenter admittunt PAVLVS & POMPO-
NIVS, sed etiam urbanas. Has enim posse aliis etiam
vicinis utiles esse, & per consequens ipsas quoque per-
inde ac rusticis esse vendibiles, ostendit Vir doctissi-
mus exemplis servitutis altius non tollendi, ne prospe-
ctus offendatur, & ipsius servitutis prospectum haben-
di, itemque servitutibus hauriendi aquam ex domo al-
terius vel ducendi. MARCIANVM, porro monet, lu-
risconsultorum more, ad ea respicere, quaꝝ frequentius
eveniunt: a) cum utique servitutibus rusticis, velut
itineris, actus, via, aqueductus, indigere possint plures
vicini, non solum iuncti atque immediati, sed etiam
disiuncti atque mediati, contra servitutibus urbanis ple-
rumque indigere nequeant alii vicini disiuncti, imo &
raro eveniat, ut eadem servitus & aliis vicinis iunctis
ultra creditorem possit prodesse, exemplis servitutis stil-
licidii, tigni immittendi, foraminis. Ergo MARCI-
ANI sententiam esse, urbanas servitutes regulariter pi-
gnori dari non posse, cum regulariter non sint vendi-
biles, ceterum, si quaꝝ urbana sit vendibilis, eam sub re-
gula non contineri. Aliter omnino respondendam esse
quaſtionem, an is, qui habet veterem servitutem iam
conſtitutam, possit illam creditori suo dare pignori? Ad
hunc casum pertinere locum MARCIANI, saltem ex
veteri ſenſu & intentione ICti, non invitus concedit
GALVANVS, ut ex eius ſententia statuatur, dominum
servitutis non posse illam pignori dare creditori suo,
nec hypotheca. Imo vero ſufficere rationem ad intel-
ligendum, non posse huiusmodi servitutem pignori
dari. Cum enim initio haec servitus confeſſa fuerit
prædio debitoris, non posse hunc servitutem auferre
prædio ſuo & transferre ad prædium creditoris: quia
servitus, ſtatiu ac separatur a prædio dominantे, extin-

D 3

gui-

a) L. 5. & seq. D. de Legib.

guitur & perit, tanquam amissio subiecto, cui ea qualitas inhærebat: quodsi ea extincta ipse aliam eius loco velit constituere, & creditori concedere, id multo minus licere, quoniam super alieno prædio nemo potest imponere servitutem. Atque rationibus ita subductis, constat, plurimum hac in parte interesset inter servitudes ruficas urbanasve constitutas iam & constitutas, a) quod negabat **C VIACIVS**, non item differentiam esse inter servitudes ruficas & urbanas, quod Vir **Summus** defendebat. Denique, ut **EM. MERILLIO** etiam respondeat **GALVANVS**, accurate monet, non valere hanc illationem: Servitus urbana erat nec mancipi, ergo non poterat fiduciari. Fiduciam enim non solum per mancipationem, sed etiam per cessionem in iure contractam esse, qua locum habebat quoque in rebus nec mancipi, & speciatim in rebus incorporalibus, ergo & in servitutibus urbanis. Eleganter & hoc obseruat, **MARCIANVM** iungere pignus & hypothecam servitutum urbanarum & ex aquo utrumque removere ab ipsis servitutibus: at in hypotheca non adhibebatur mancipatio, cum solo nudoque conuenientia contraheretur, & consequenter etiam in rebus nec mancipi. Addit, omnem antiquam rerum mancipi & non mancipi differentiam exulare iustam esse a Iurisprudentia **IVSTINIANI**. Ergo nec iuri novissimo, nec veteri convenit ratio differentiae servitutum a qualitate rerum mancipi & nec mancipi petita, & quam ipse **MERILLIVS** b) alias dubitanter protulit.

§. XXIV.

Iam ad locum **MARCIANI** ex libro singulari ad for-

Vestigi-
um Fidu-
cia & em-

- a) Atque hanc distinctionem probat & sequitur quoque **GER. NOODT**, *Comm. ad D. t. de pignorib.* p. 439.
 b) *Commentar. ad Tit. D. de servit. ad l. 14. pr. ill. tit. in Thefauro Iur. Civ. Tom. III. p. 645.*

formulam hypothecariam in L. XVI. §. ult. D. de pign. blema
 & hypoth. fistit nos WISSENBACHII a) eumque se- TRIBONIA-
 cuti VLR. HVBERI b) opinio, latere in eo loco pi- N in L. 16.
 gnus fiduciarium, ut quod in se continuerit legem §. ult. D.
 commissoriam. Verbis autem: Potesit ita fieri pigno- de pign.
 ris datio hypothecæque, ut si intra certum tempus non negatur.
 sit soluta pecunia, iure emptoris possideat rem, adiectam
 esse a TRIBONIANO clausulam, qua sequitur: iusto
 pretio tunc aestimandam. His postremis verbis attem-
 peratum esse MARCIANI locum iuri novo, c) a
 CONSTANTINO, sublata lege commissoria pigno-
 rum, inducto, ita, ut si res non simpliciter addicatur
 pro pecunia credita, sed eo pretio, quod elapsò tempo-
 re definitum fuerit boni viri arbitratu, tale pactum,
 quippe in quo nihil sit acerbi, valeat. At enimvero
 ad liquidum iam perductares est, Fiduciam nihil habu-
 isse commune cum lege commissoria, nisi hæc pignori
 fiduciario speciatim adiecta fuisset. Neque hunc MAR-
 CIANI locum ad legem commissoriam pertinere, lu-
 culenter ostendit Vir Summus, IAC. GOTHOFRE-
 DVS: d) quia scilicet res debitoris non simpliciter
 committitur, nec creditori absolute relinquitur, sed con-
 ditionalem esse venditionem, quanti ea iusto precio suo
 die aestimabitur: cum econtra lex commissoria sit, cum
 debitoris res seu pignus simpliciter committitur in vi-
 cem debiti, eique pleno & absoluto iure adquiritur,
 seu a debitore transvertitur ad creditorem. Ergo nec
 vesti-

a) Emblemata Tribonian. ad h. l.

b) In Eunomia Romana, ad h. l. p. 732.

c) FRANC. BALDVINVS in Vita Papinianni, haec verba: IV-
 STO PRETIO TVNC AESTIMANDAM, adscribit PAPI-
 NIANO, quo libellos agente SEVERVS & ANTONIVS
 ita rescriperint, iustissimum pactum, quo lex commissoria
 corrigeretur, approbantes.

d) Comm. ad L. un. C. Thcod. de commissor. rescind. p. 255.

vestigium Fiduciae, nec emblema Tribonianii in hoc loco vere later, qui propterea ex numero Emblematum a WISSENBACHIO congregatorum expungendus erit: nec nos ei diutius immorabimur.

§. XXV.

Vestigium Manifestum vero pignoris fiduciarii vestigium apparet in L. XXIII. §. 1. D. de pignoribus, qua desumpta est L. 23. §. 1. ex MODESTINI Libro III. Regularum. Quod enim ibi tradit Iurisconsultus: *Pignoris obligatio etiam inter absentes recte ex contractu obligatur:* a) id omnino ad pignoris, quod ex contractu traditione rei constituitur, differentiam a pignore sub Fiducia contracto pertinet. Hoc enim non nisi inter praesentes fieri poterat, cum & mancipatio & in iure cessio, tanquam actus legitimi, praesentiam personarum contrahentium & solemnia verba, tantum inter praesentes pronunciari solita, b) requirerent. At e contrario nudi pignoris obligationem retinam inter absentes, per nuncium, epistolam, procuratorem contrahi, MODESTINVS docet, translationi dominii per mancipacionem, vel in iure cessionem pignoris fiduciarii, diserte opponens obligationem ex contractu. Nec proinde pro verbis, ex contractu, rependum erit ex conventione, cum V. C. GER. NOODT, c) illud: ex contractu: incogitantia MODESTINI tribuente.

§. XXVI.

Vestigium Eodem modo naturam pignoris a Fiducia diversam notat TRYPHONINV S in L. XII. pr. D. de divisione stract. pign. qua est ex eius Libro VIII. Disputationum, ubi: D. de diff. pign.

- a) De locutione hac: *Obligatio obligatur*, vid. Cl. DVKERVS de latinitate Iuris. vet. p. 331.
- b) §. 12. Inst. de inutil. stipulat. L. 1. pr. & §. 1. D. de verb. oblig. L. 123. pr. D. de Reg. Iur. vid. GER. NOODT Observ. Lib. II. c. 8.
- c) Comment. ad D. t. de pignor. & hypoth. p. 434.

ubi: *Rescriptum est*, ait, ab *Imperatore*, *libellos agente PAPINIANO*, *credитorem a debitore pignus emere posse: quia in dominio manet debitoris*. Attigimus iam differentiam hanc inter pignus nudum & quod sub Fiducia mancipatum, in Exercit. I. §. XVIII. Scilicet cum dominium non possit, nisi ex una causa, contingere, & quod nostrum iam est aut proprium, magis aut amplius nostrum fieri, ac proinde rei propriæ emptio consistere nequeat, a) creditori vero res fiduciaria iam per mancipationem aut cessionem in iure acquisita sit, fieri non potest, ut debitor creditori Fiduciam vendat: pignus econtra, quoniam in dominio creditoris non est, ei utique potest a creditore vendi & in solutum dari. b) Quare fallitur CL. SALMASIVS, c) dum verba PAVLI, *Fiduciam creditori a debitore vendi posse negantis*, explicat de nudo pignore, atque ex datione in solutum, d) cuius mentionem fecimus, effingit dominium a Principe impetratum, prout accurate monuit V.C. ANT. SCHVLTINGIVS, e) atque simul removit scrupulos, a GVIL. MASIO f) iniectos, qui quident in eadem opinione videtur harere cum IAC. RAEVARDO, g) Fiduciam vi & potestate fiduciariæ mancipationis ad creditorem pleno dominii iure pertinuisse, pariter negante, ut propterea creditori, si fiduciariam rem distrahere non posset, opus fuerit Principia-

E

cipa-

-
- a) §. 10. *Inst. de Legat.* & §. 14. *Inst. de Action.* L. 14. §. 2. D. de except. rei iud. L. 159. D. de Reg. Iur. L. 4. C. de contr. empt.
- b) L. 20. §. ult. D. de pignor. att. L. 7. §. 6. D. de donation. int. vir. & ux. L. 13. C. de pignorib. & hypoth.
- c) De modo *Vsurarum* c. 13.
- d) In d. l. 13. C. de pignorib.
- e) Ad PAVLI Sent. Lib. II. Tit. 13. §. 3.
- f) *Singular. Opinion.* Lib. III. c. 1.
- g) *Be Autorit. Prudent.* c. 5.

cipali rescripto ad plenum eius dominium impetrandum fidemque remancipationis extinguendam.

§. XXVII.

Fiduciae vestigium um Fiducia in L. IX. §. 2. D. de Supellec*tum* legat. quæ in L. 9. §. est ex Libro VII. Responsorum PAPINIANI. Verba eius sunt: *Supellec*tum* sua omni legata, acceptum argentum pignori non continebitur, quia supellec*tilem* suam legavit, utique si non in usu creditoris id argentum voluntate debitoris fuit, sed propositum propter contractus fidem & restituenda rei vinculum.* Sensus PAPINIANI est: Si testator omnem suam supellec*tilem* legavit, eo legato non etiam contineri, quæ pignori accepta est, ne quidem, si in eius usu fuit voluntate debitoris; quia non ideo, quod in eius usu esset, eius fuit: sed si dominium quoque debitoris voluntate accepit, ut sit in Fiducia, legata omni sua supellec*tile*, etiam pignori acceptam contineri, quem in modum iam CVIA CIVS a) ista verba de Fiducia intellexit, & plenus expouit GER. NOODT, b) qui etiam pro verbis: *si non in usu creditoris c) id argentum voluntate debitoris fuit,* legit: *Si non iuris creditoris &c. ita, ut ius nihil aliud sit,* quam

a) Ad PAPINIANI Responsor. libr. VII. ad h. I. Conf. SCHVLTING. ad PAVLI Sent. Lib. II. Tit. 13. §. 6.

b) Observation. Lib. II. c. 10. ubi SALMASII sententiam circa intellectum huius loci refellit.

c) Alias hæc verba nodum neclunt, quem nemo solverit. Pignus enim, quo creditor uititur suo periculo, voluntate debitoris, intelligi non potest, quanvis einsmodi pignoris dominium quasi translatum esse in creditorem putet V. C. LAN. A COSTA ad §. 2. Inst. quib. mod. re contr. oblig. cum nulla iuris auctoritate tale quid nitatur, nec usus & periculum rei alicui per se conciliare aliquod dominium possint: uti monet SCHVLTING. l. c.

quam dominium, a) & sic planissima sententia existat :
Supellec̄tis sua omni legata, acceptum argentum pignori
non contineri : utique si creditor dominium pignoris non
acceptit, contracta Fiducia : nam si hoc sit, magis credito-
ris esse ; adeoque Fiduciam eo legato contineri, pi-
gnus non contineri, quippe quod est debitoris, tan-
quam repositum, b) hinc ut CVIACIUS legit, oppositum,
ut NOODTIVS optime, depositum propter contractus
fidem & restituenda rei vinculum, seu, quæ ISIDORI c)
locutio est, propter rem creditam.

§. XXVIII.

Restat ex Pandectis L. XLV. de Reg. Iur. quæ *Vestigia*
est ex VLPIANI Libro XXX. ad Edictum, in qua Fi-
duciae vestigia iam animadvertisit IAC. GOTHOFRE-
DVS. d) Neque pignus, ait VLPIANVS, neque deposi-
tum, neque precarium, neque emptio, neque locatio rei
sue confilere potest. Privatorum conventio iuri publico
non derogat. Evidem GOTHOFREDVS tantum
postremam legis partem pacto fiduciario aptandam
censet, nimirum conveniri non posse, ut creditor Fidu-
*ciam pleno iure acquirat, sic, ut hyperocham restitu-*in L. 45. D.**
re non cogatur : quemadmodum vice versa, si inter
credитorem & debitorem convenerit, ut Fiduciam ven-
dere non liceat, ex tali conventione actio nasci non
sue confilere potest.

E 2

pot-

a) Ut apud PAVLVM Sent. Lib. I. Tit. 13. §. 7. Eas res, quas
quis iuris sui esse putat, petere potest : & Lib. II. Tit. 12.
§. 1. Deponere possumus apud alium id, quod iuris nostri est
vel alieni : & in L. 2. C. de reb. alien. non alienand.

b) In exemplari Florentino est: *propositum. Sed pignus non*
proponi, aut reponi dicuntur, verum deponi, ut apud PAV-
LVM L. 36. D. de condic̄t. indeb. & Sent. Lib. II. Tit. 5.
§. 1. & in rubrica 4. eiusd. libri, de commodato, & deposito
pignore fiduciave, ubi SCHVLTINGIVS.

c) *Lib. V. Originum c. 25.*

d) *Commentar. in Tit. D. de Reg. Iur. ad h. l.*

potest. a) Sed & primam quoque partem, seu principium huius textus ad fiduciarium pignus pertinere, non dubitamus, cum illo *Libro trigesimo ad Editum VLFIANVS*, ut ex coniunctis locis b) noscitur, de *pignoribus egerit*, atque ex hac regula iuris id omnino consequtatur, quod *PAVLVS in Sententiis receptis docet*, & ad quod respicere *TRYPHONINVM* supra vidimus, c) debitorem creditor *Fiduciam vendere non posse*: quia scilicet non magis emptio, quam depositum, aut precarium, aut conductio (quod nomen in textu reponendum est pro *locatione*) rei sua consistere potest. Imo vero postremam legis partem huic sententiae optima ratione sic aptare licet: *privatorum conventionem iuri publico non derogare*, adeoque, etiam si per suppositam personam creditor *pignus suum*, (id est sub *Fiducia sibi mancipatum*) invito debitore comparaverit, emptionem non videri, & ideo quandocunque lui posse: *ex hoc enim, ut PAVLVS d)* inquit, *causa pignoris vel Fiducie finiri non potest*: quæ ipsa verba nihil aliud, quam ius publicum fiduciarii pignoris & regulas iuris, quod nemo rei sua possit esse emptor, e) nec eiusmodi commentitia venditionis callidum instrumentum subsistere debeat, f) manifeste respiciunt.

§. XXIX.

a) Vid. supra §. XIII.

b) L. 22. §. 24. D. de pign. a. l. 3. D. de leg. commissor.

c) §. XXIII.

d) Sent. Lib. II. Tit. 13. §. 4.

e) SENECA de Benefic. Lib. V. c. 10. Numquid non demens videbitur, qui aliquid vendidisse sibi se dicet: quia venditio alienatio est, & rei sue iurisque sui in aliud translatio.

f) L. 9. D. de reb. eor. qui sub tutel. L. 10. C. de distr. pign. L. 1. Cod. Theod. de integr. restitution. L. ult. C. se advers. vendition. Vid *CVIACIVS & SCHVLTINGIVS ad PAVL* Sent. l. c.

S. XXIX.

Iam in Codice Imperialium Constitutionum, a quo *Fiduciae*
 sicut Constitutiones superfluae & inusitatae repetita *vestigia*
 prælectione separavit IMP. IVSTINIANVS, a) ita *quædam*
exigua tantum Fiducia quædam vestigia in illo relicta, b)
in Codice IVSTIN.
 Equidem tres priores Constitutiones Tituli de *pigno-*
ratitia Actione, quæ singulæ de fructibus ex pignore
 perceptis in forem imputandis & superfluis restituendis,
 & dannis a creditore reparandis tractant, æque
 nudo pignori, ac fiduciario convenienti, ut proinde
 non sit, cur illis immoremur. Rescriptum vero DIO-
 CLETIANI & MAXIMIANI in L. IX. eius Tituli
 utique differentiam nudi pignoris a Fiducia declarat
 ab initio, verbis: *Pignus in bonis debitoris permanere,*
ideoque ipsi perire, in dubium non venit: quam diversi-
tatem eiusque rationem iam satis explicatam dedimus.
 Prorsus denique de servis sub Fiducia mancipatis agere
 videtur IMP. ALEXANDRI Rescriptum, L. II. C. Si
vendito pignore agatur, Aemiliano datum in hæc verba:
Servos, quos nullo iure a creditore venisse dicis, pa-
ter tuus, vel tu, si hereditas eius ad te pertinet, a posses-
soribus petere potes. Quodsi usucapii sunt, petat pater
tuus premium eorum a creditore, qui non iure eos vendi-
dit. Et acute monuit CVIACIVS, b) in huius Re-
 scripti secunda parte haud temere omissa esse verba:
vel tu, quæ sunt in prima parte posita: pater tuus, vel
tu a possessoribus petere potes. Nimirum pertinet Re-
 scriptum ad eum casum, quando pignus fiduciarium
 non iure, i.e. omisis, quæ fieri debent, denunciatio-
 nibus a creditore venditum. Tunc enim, ut supra c)
 ex PAVLO vidimus, heredibus debitoris, qui ratam

E 3

ven-

a) *Conſt. de emendat. Cod. D. Iuſtiniani, & ſecunda ei. editio-nc, §. 3. 4.*

b) *Obſervation. Lib. VII. c. 26.*

c) §. XII.

venditionem non fecit, actio adversus creditorem non datur. Quare Imperator rescriptit, si propter usucaptionem a possessoribus completam rei vindicatio locum habere nequeat, pretium petere posse debitorem a creditore, qui non iure vendidit, non item debitoris heredem, cui rescribitur: sed huic in prima Rescripti parte concedit rei vindicationem, qua creditorem ab emptore suo conventum evictionis præstandæ necessitatibiicit: quippe ad pignoris evictionem tunc deum non tenetur creditor, quando iure venditionem suscepit. a)

§. XXX.

*Fiducia
mentio in
Legibus
Langobardo-
rum.*

Cum in Codice Theodosiano extaret Fiducia Constitutione ARCADII & HONORII firmata: b) mirandum non est, eam apud illos populos saltem nomine tenus cognitam & in Legibus eorum commemoratum esse, qui Codici Theodosiano tantum auctoritatis & honoris detulerunt, ut huius usum non modo cesserint provinciis Romanis a se occupatis, sed etiam ex eo haud paucia in consuetudines legesque suas adsciverint. Hinc enim est, quod in Legibus Langobardorum habetur de Fiducia in Lege CLXXIV. ROTHRARIS REGIS: c) Ipse autem, qui garathinx suscepit ab illo, quicquid reliquerit donator in diebus obitus sui, habeat licentiam in suum dominium recolligere & debitum creditoribus solvere, & ab aliis requirere, ET QVOD IN FIDUCIAE NEXV POSITVM EST, REDDAT, ET REQVIRAT REM IN FIDUCIAE NEXV

a) L. u. §. 16. D. de action. empt. L. 1. & 2. C. creditor. eviction. pignor. non deber.

b) L. 9. C. Th. de infirm. his que sub Tyrann. Valeat omnis mancipatio Tyrannicis facta temporibus -- pignoris atque Fiducia obligatio perseveret.

c) Apud MVRATORIVM, Rer. Italic. Scriptor. Tomi I. Par-te II. Alias est Legum Langob. Lib. II. Tit. XV. lex 3.

NEXV POSITAM. Et in LVITPRANDI REGIS Legum Libro VI. Lege V. a) Si infans, dum infra etatem est, res suas cucunque vendiderit, aut INFIDUCIAVERIT, & postea quum in legitimam etatem per venerit, chartam ipsam secundum legem irrumpere voluerit, & in rebus ipsius introire, non habet potestatem qui emit, aut INFIDUCIAVIT, qui dederit, requiri. Quia quando comparavit, aut INFIDUCIAVIT, tunc debuit prospicere; quia puer ipse infra etatem erat, & contra legem faciebat. Propterea constitutum est, ut qui intra etatem fuerit, minime vendere aut INFIDUCIARE possit. Et talem causam eum habere dicimus, qui emit, aut INFIDUCIAVIT, quam & ille habere videtur, qui de servo, aut alio nomine emere aut INFIDUCIARE dignoscitur. Prior Lex loquitur de donatione universitatis, sive omnium bonorum, b) & donatario sicut facultatem credita exigendi, & quod sub Fiduciae nexus positum reliundi attribuit, ita obligationem debita solvendi, & quod sub Fiduciae nexus positum est, reddendi imponit. In altera Lege infiduciare tam active, quam passice, tam de minore suam rem Fiduciae obligante, quam de creditore eam accipiente dici videmus.

§. XXXI.

Sed vero, licet in illis Langobardorum Legibus Fiduciae pariter ac in Capitularibus Regum Francorum c) & char-^{nomen pi-}
tis^{gnus mu-}
^{dum apud}

a) Apud eundem. Est alias Lib. II. Tit. XXIX. lex 2.

b) Talem donationem enim notat verbum *garathinx*, ex Germanico *gar*, *prorsus*, *omnino*, *omne*, & Longobardica voce *Thinx*, *donatio*, compositum. Vid. DV FRE SNE in Glosso. v. *Garathinx*.

c) Capitula data Presbyteris, apud STEPH. BALVZIVM in Append. ad Capitularia, cap. 9. Nullam habeat potestatem quolibet modo alienandum, neque INFIDUCIANDVM, neque venundandum.

*Lango-
bardos & Francos* tis antiquis a) extare videamus nomen *Fiducia* & verbum *infiduciare*: minime tamen Fiduciam Romanorum, i.e. pactum mancipationibus pignoris causa factis adiecitum, Langobardis, aut Francis, aut aliis gentibus Germanicis receptam suisse inde colligemus. Neque enim difficiles mancipationum solennitates vel Langobardis vel aliis originis Germanicae populis placuisse atque in leges vel usum eorum ivisse usquam apparet: quin potius sicut *mancipationis* b) nomen venditioni publicae, sive *auctiōni* apud Langobardos inditum noscimus, ita *Fiducia* nomen cuicunque pignori applicatum esse, rectius dicetur: id quod etiam promissus fere verborum *Pignoris* & *Fiduciae* usus apud Interpretēti Sententiarum *PAVLI* & apud Auctorem incertum *Consultationis Veteris* haud parum confirmat. Ac ne quem suspicendum teneat auctoritas *GVNDLINGII*, c) non dissimilabimus, eum præsidii sūz sententia querendi causa excitasse Legem *ROTHARIS CLXXXIII.* d) sed in qua non, ut Vir Celeberrimus exhibuit, **VENDERE ET LOCO PIGNORIS**, verum: **VENDERE AVT LOCO PIGNORIS ponere** legitur: adeoque non venditio pignoris causa facta, sed oppignatio venditioni opposita in hac lege memoratur. e)

§. XXXII.

a) Charta Sicardi Principis Beneventani in Chronico S. Sophiae: *Res illas - - quas Allo liber homo INFIDUCIavit, aut in pignus tenuit a servis nostri Palati.* In charta anni MLIII. apud *FRICELLVM*: *In beneficium dare, sive per pignus INFIDUCIARE.* Vid. *DV FRESNE* in *Glossar. v. infiduciare*.

b) In Lego *ROTHARIS CCXXX.* ubi vid. *MVRATORIVS Conf. DV FRESNE, v. mancipata.*

c) *Sched. de iur. oppignor. territor. §. 75.*

d) Alias Leg. *Longobard. Lib. II. Tit. XV. lex 2.*

e) Multo minus in *Libris Feudorum* aliquod *Fiducia* Romanæ vestigium querendum est, quamvis tale quid *I. F. 29. de*

§. XXXII.

Quorsum vero hæc? Nimirum ut intelligatur *Conven-*
tandem differentia inter Fiduciam, quam expoliumus, ducia Ro-
Romanorum, & fiduciarium pactum, quod est Iuris manorum
Gentium, usu exigente & humanis necessitatibus tale similes, ab
quid suadentibus, apud plerasque Germania, imo Eu- illa non
ropæ gentes ab antiquo usitatum ac in diversis negotiis repeten-
& contractibus receptum. Translationem enim do-
minii temporariam sicut necessitates varia sapientia ex-
torquent: ita pactum de restituenda atque interea fi-
deliter curanda re hoc modo alienata servandum, pe-
riculum vero & infortunium rei in dominium alterius
translate ad accipientem pertinere, dictamen rationis
humanæ iubet. Ut propterea frustra sint Viri Docti,
qui omnes alienationes sub pacto de restituendo fieri
solitas ac inde veniente periculi & casus fortuiti pra-
stationem in Germania a) & Gallia b) a Fiducia Ro-
manorum repetere voluerunt, & verissime SHILTE-
RVS domesticæ Saxonum prudentiæ legislatoriæ ad-
scripserit illud Fiducia simile IVRIS SAXONICI c)
placitum de dominio ac periculo pignoris & commo-
dati, d) Imo vero Germani olim in pluribus negotiis

F

fidem

de feudo dato lege commissoria, deprehendisse sibi visus
 sit CVIACIVS ad b. t. fiduciam sub lege commissoria in-
 telligi putans.

- a) STRAVCHIVS de Oppignorat, rer. Imper. c. 5. §. 13. SPI-
 TZIVS de Oppignorat. Iur. Part. II. c. 4. §. 8. GVNDLIN-
 GIVS cit. sched. §. 74. Hic tamen dubitanter.
- b) GVIL. BVDAEVN Annotation. ad Pand. fol. 19.
- c) Ius Sax. Provinc. Lib. II. art. 24. T art. 60.
- d) Optime iudicat Cl. POTGIESER l. c. §. 16. Inde tamen
 firmiter non sequitur, Germanos in pignore suo Fiduciam
 Romanam imitari voluisse. Id tanto conspicuus est, quo
 clarius constat, Germanorum contractum pignoratitum a
 Fiducia Romanorum in multis diversum esse. In pignore
 Ger-

fidem restituendi in temporario dominio excoluerunt; sed quæ omnia fuerunt moris atque instituti mere Germanici: & hoc pertinent tutela legitima, eaque fructuaria, a) itemque cura bonorum absensis, b) feuda oblata, c) feuda fiducaria a pignoratitiis diverla, d) & investitura atque possessio vicaria. e) Vnde frequens in chartis vetustis Germanorum formula: *Ad fidelem manum tenere.* f) Quis autem hæc iura, hodie-

que

Germanico omnes fructus & proventus creditoris cedunt, quod in Fiducia fecus erat, ubi in formam imputabantur, eamque minuebant. Itaque portius tenendum erit, si illiusmodi contractum inventum esse proprium Germanorum. Qui aliter sentiunt, eos oportet stupitudinem gentis nostræ proficeri, quasi ex propria ratiocinatione eiusmodi contractum formare haud potuissent, sed opus haberent eundem a Romanis mutuo sumere, & in mores suos transference.

- a) Quam luculenter exposuit DN. DE LVEDEWIG singulari *Dissertatio de Tutela fructuaria.*
- b) De qua *FRAESES* in programmata Lipsiensi, quo *cura feudi absente Vasallo successoribus in feudo proximitate afferta.*
- c) Vid. *HERTIVS de Feudis oblatis part. II. §. 32.*
- d) Vid. *SCHILTER. Comment. ad Ius Feud. Alem. c. XCVII. §. I. seq. GVNDLING. cit. sched. §. 89.*
- e) Qualis investitura vicaria fit provafallo, dem Lehn-Träger, non tantum in feudis, de qua actum in Dissert. Vitembergenii *de Provafallis*, sed etiam in bonis feudo vicinis, & ubi traditio bonorum immobilium iudicialis adhuc obtinet, in alio liberi. Investitura provafalli haud raro coniuncta est cum vicaria feudi possessione, ut in feudo tutelari & feidis universitatum. Vid. *dicta Dissert. §. 12. 19. & 24.*
- f) Dabimus insigne formulæ huius exemplum & reliquiis, quas possidemus, Diplomatarii Vetero-Cellensis, cuius iacturam *SCHLEGELIVS & KNAVTIVS* in historia inelyti illius monasterii haud parum doluerunt. Sunt vero litera Reinhardi & Theodorici de Honsberg, qui se villam suam Abbatii & conventui vendidisse testatum facientes, & soluta sibi pretium confessi, sese dominio utili prorsus abdicant.

vi

que Germanis maximam partem usitata, putet a Fiducia Romanorum arcessenda, nisi qui, rerum Romanarum & patriarcharum parum rectis notionibus adsuetus, ex eorum sit censu, qui minima similitudine decepti nil nisi mera instituta Romana ubique in Germania vident, &, quod suspicantur, vigilantes somniant.

vicaria tantum vasallagii functione retenta. *Nos Reinhardus de Honsberg, nec non Theodericus iunior filius Friderici militis dicti de Honsberg in presenti pagina publice recognoscimus & fatemur, quod venerabilis Dno Cunrado Abbatii in Cella sancte Marie & ipsis conventui unanimi cum consensu & bona voluntate nostra rite & rationabiliter villam nostram, que ad sanctum Michaelm dicitur, sitam circa villem Erlwigisdorf cum omnibus iuribus & consuetudinibus, utilitatibus ac aliis attinentiis ad prefatam villam pertinentibus pro centum sexagenis latorum grossorum vendidimus perpetuo possidendum, & memorare centum sexagene a Dno Abbatie & conventu Monasterii predicti nobis totaliter sunt persolute. In prefata igitur villa omnino nolis nichil iuris ac proprietatis nobis reservamus, nec reservare volumus, nisi ad ipsius Abbatis & conventus instantiam petitionem iura feodalia, que teutonicae dy leyn dicuntur, sine doli vel aliquius mali admixtione fideliter in manibus nostris sive ad fidem manum tenere volumus, nichilque nobis iuris vel consuetudinis in eadem villa conservando, sed prenominato Abbatii & conventui ad possidendum, gubernandum, uti frumentum tam diu, donec a Dno Marchione appro priacionem seu incorporationem sepe nominare ville valeant obtinere. Et pro eadem incorporacione consequenda & optimanda prefatum Abbatem & conventum coram Dno Marchione nostris amicorumque nostrorum precibus fideliter promittimus adiuvare. Ut igitur &c. Anno Dni MCCCXLVIII. V. die mens. Februarii. Vernacula formula: *Zu treuen Händen tragen, in litteris investiturarum sepius occurrit. Vid. Cl. LVNIGII Corp. Iur. Feud. Germ. T. II. p. 1075. & p. 1273. Inter formulas incierdingicas hodieque est: Sich eine treue Hand setzen lassen. Vid. Conf. I. W. GERICKEN Spicilegium ad SCHOTTELII Tr. de Singularib. Germ. iurib. in Append. 3. p. 184.**

••2) o (20

ADDENDA.

I. Iam ante SALMASIVM, quem IAC. GOTTHOFREDVS notavit, (vid. Exercit. I. §. II. not. d) FOPPIVS AB AEZEMA Differt. Iur. Civ. Lib. I. c. 22. Fiduciam putavit a fide dictam pro pignore: quia creditor accepto pignore confidentior reddatur, & quasi pignus fidem illam, quae debitori non habita fuit, creditor iustificet, L. 12. §. fin. D. de furt. quare & BOETHIVM, quod in Commentar. in Topic. Ciceronis falsam Fiduciæ descriptionem dederit, & GVIL. BVDAEVN, quod sit eam fecutus, reprehendit, ac Fiduciam nihil aliud esse, pronuntiat, quam fidem pignoris.

II. Miris sunt, parumque coherentia, quæ FRANC. HOTMANVS ad Orat. Cic. pro Q. Rosc. Com. c. 6. commentus est de Fiducia: *Essè contractum, quo fidem alterius fecuti, rem ei aliquam simulandi tantum causa mancipamus.* Fiduciam igitur, ut mox subiicit, tum dare dicimus, quum eius fidem, qui nobis iure civili obligari non potest, sequimur. Reclius vero de Fiducia pignoris sensit, ubi differentiam eius a lege commissoria pignorum expouit contra CVLACIVS, Epitom. in Pand. Lib. XX. §. 7. seq. coequo loco etiam observarit, Fiduciam post CONSTANTINI Constitutio- nem, qua lex commissoria sublata, permanisse ad ARCADII & HO- NORII statem.

III. Quod ANDR. TIRAQVELLV & FRID. TAVBMANNVM de lo- cis CICERONIS pro Rosc. Com. c. 6. & pro Cæcina c. 3; observatis di- ximus Exercit. I. §. XV. FRANC. BALDVINVS iam animadvertisit, de- positum a CICERONE sub nomine Fiduciæ intelligi, Cateches. Iur. Civ. Cap. 4. §. 34. Confer. GUNDLINGIANA Part. II. Obs. 8. §. 5. ubi GRAEVIVS, in not. ad Orat. pro Q. Rosc. contra sentiens, merito notatur.

IV. Verbum *Fiduciare* in loco TERTVLLIANI de *Idolatria* c. 23. *Pecuniam de ethniciis mutuantes, sub pignoribus fiduciati, iurati cavent:* utique pignus sub Fiducia mancipatum significat, non pignus nudum, ut IAC. PAMELIO videtur, qui tamen recte legit: *mutuantes sub pignoribus fiduciatis.* Vulgarem lectionem secutus est CHRISTOPH. COLERV in *Parerg. libr. sing. c. 25.*



Helmstadt, Diss; 1732-33



3

f

5b.

VD 18

